



«Ի ԽՈՐՈՑ ՍՐՏԻ»

Անարժան համեստաբար և խոնարհաբար հայցում է Ձերդ Սրբության բարձր ներողամտությունը՝ այս անգամ Ձեզ դիմելու ոչ թե **Դուք**-ով, այլ **Դու**-ով՝ դրանով իսկ հաստատելով այն պարզ ճշմարտությունը, որ խոնարհամիտ որդու և մեծահոգի հոր միջև կապը այնքան անմիջական է և անսերևեթ, որ որդին երբեք իրեն թույլ չի տա կեղծավորաբար հորը դիմելու **Դուք**-ով:

Դու Քո մանկությունն անցկացրիր բարեպաշտ մի ընտանիքում, որտեղ Քո հոգին զովեց, պարզվեց և պատրաստվեց ապագա Քո մարդասիրական գործունեությանը:

Պատանեկության և երիտասարդության շրջանում Դու ամբարեցիր լույս և գիտություն՝ միաժամանակ նաև այդ ամբարած լույսն ու գիտությունը հաղորդեցիր մեր ժողովրդի մատաղ սերնդին: Դու դրանով դարձար նրա **ուսուցիչը**:

Հասուն շրջանում Քեզ անմնացորդ նվիրեցիր Քեզ իսկ ծնած և ձևավորած ազգին և նրա դավանած Քրիստոսի Եկեղեցուն: Այդ կոչման մեջ Դու մնացիր հավատարիմ և նվիրյալ և դարձար նրա **հոգու կերտիչը**:

Վեհաբանում մի առիթով Դու շեշտեցիր հետևյալ միտքը. «Եթե իմանայի, որ ես, հոգևորական դառնալով, չեմ ծառայելու իմ ժողովրդին, հոգեվորական չեի դառնա»: Այդեպս էլ եղավ. Դու ընտրեցիր Հայաստանյայց Առաքելական Սուրբ Եկեղեցուն ծառայելու նվիրական գործը: Իսկ երբ համայն հայ ժողովուրդը ընտրեց Քեզ այդ նույն Եկեղեցու Ամենայն Հայոց Կաթողիկոս, Քո ազգային գործունեության շրջանակն անհամեմատ ավելի ընդլայնվեց, և Դու դարձար Քեզ ծնած ժողովրդի **ազգային մեծ գործիչը**:

Այսպիսով, ուրեմն, Վեհափառ Հայր, Քո անաղարտ և սրբակյաց կյանքը ապացույցը եղավ այն բանի, որ Դու Քո պատանության և երիտասարդության շրջանում եղար ուսուցիչը Քո ազգի, ավելի հասուն շրջանում՝ հոգու կերտիչը, ապա նաև՝ ազգի առաջնորդը և անփոխարինելի հոգևոր հայրը:

Դու արժանի ես դասվելու մեր ազգի անմահների շարքը:

Դու չցանկացար Քո 86 տարին բոլորել մեզ հետ: Երևի, ավելի ճիշտ կլիներ ասել, Ամենակարող Տերը ավելի վաղ ցանկացավ Քեզ տեսնել իր կողքին: Տիրոջ կամքն է... Համենայնդեպս Քո այսրաշխարհային մարմինը ի գործ չեղավ կրելու վերջին հինգ տարիների ազգի տառապանքներից

ստացած բերքը և ... սակայն որևէ արհաբար և անմոռուն կրեց և տոկաց Քո սրբակյաց հոգին, թեև ազգային այդ ողջ տառապանքի զգացման ահալորությունն ուղղակիորեն անցնում էր Քո այդ նույն այնքան զգայուն հոգով:

Դու Քո բոլորանվեր հոգևոր և լուսավորական անմնացորդ գործունեության համար մեր նորանկախ պետության իշխանությունների կողմից արժանացար ազգային հերոսի կոչման:

Արժան և իրավ:

Բայց, ցավոք սրտի, եղան մարդիկ, որոնք Քո ազգանվեր գործունեությունը որոշ շրջանում թերահավատությամբ ընդունեցին: Վնաս չունի, այդպես էլ է լինում: Իսկ Քո կյանքի վերջին շրջանը եկավ ապացուցելու այդ նույն թերահավատներին, որ իզուր չես արժանացել ազգային հերոսի կոչման:

Մեր ազգի վերջին այս հինգ երկար ու ձիգ տառապալից տարիներին ազգի և Եկեղեցու հավերժ գոյության համար թափած Քո ջանքերը, Քո բարձրացրած արդարացի ձայնը՝ ի բարօրություն և փրկություն մեր բազմադարյան տառապյալ ազգի, դրա վառ ապացույցն են:

Մեր նորանկախ պետության ղեկավարը Քո թաղման արարողության ընթացքում, Քո շիրիմի առջև, ի ցավ սրտի, շեշտեց այն մասին, որ Դու հեռացար այս կյանքից՝ Քո իղձերից մեկը իրականացած չտեսած... Բայց ես հավատացած եմ, որ մեր Եկեղեցու հաջորդ գահակալը իրականացած կտեսնի այն: Մեր ժողովուրդը այդ հարցին կմոտենա խելամոտրեն:

Համայն ազգը հայոց, իր մեծավորներով և փոքրավորներով, մասնակից էր և ականատես Քո վերջին հրաժեշտին: Մասնակից էին նաև մեր հարևան և հեռավոր բարեկամ ու սգակից ժողովուրդների հոգևոր և աշխարհիկ ներկայացուցիչները: Բոլորը հավաքվել էին Քո ապագա հավերժական դամբարանի առջև և սպում էին Քեզ հանձնելու, սվելի ճիշտ՝ Քեզ բնակեցնելու Քո ապագա բնակարանում, մի բնակարան, որտեղից ապագայում պետք է լույս ճառագի համայն հայ ժողովրդի վրա:

Ամեն ինչ ըստ պատշաճի էր և տեղին: Խոսք չկա: Բայց, անկեղծորեն ասած, սրտի խոր ցավ զգացի, երբ Դու օրվա այդ տապին «շրջում» էիր Մայր Աթոռի շրջափակում՝ առանց ամպհովանու, մի բան, որ անսովոր էր Քեզ համար: Արևի թվացյալ պայծառ լույսը Աստուծո հրեշտակների լուսապայծառ ներկայությունն էր, որ անվերջանալի ճառագում էր Քեզ վրա: Չէ՞ որ քիչ հետո Դու հավերժորեն լինելու էիր նրանց կողքին:

Քո՛ ինը տասնամյակների բերքի տակ կքած ծերունագարդ մարմինը զգում էի, որ շտապում է իր հավերժական բնակարան, որովհետև անասանորեն հոգնած էր...

Արարն ավարտվեց և փակվեց Քո այրակյանքի վարագույրը: Բայց ոչ, անմահները չեն մեռնում, նրանք հավերժում են...

Ինչպես ամենակարող մեր Տեղի Հիսուս Բրիստոսը իր այս աշխարհային մահով եղավ փրկիչը համայն մարդկության, այնպես էլ Դու Քո այս աշխարհային մահով եղար և այսուհետև ևս պետք է լինես փրկիչը համայն հայության:

Դու արժանի ես ասելու.

«Առ քեզ, Տեղ, համբարձի զանձն իմ...» (Սաղմոս Դավթի ԻԴ):